

**Uunga siunnersuut: Qimmeqarneq qitsuuteqarnerlu pillugit Inatsisartut inatsisaat**  
(Aalisarnermut Piniarnermullu Naalakkersuisoq)

**Saqqummiussissut**

**Siullermeerneqarnera**

Qimmiuteqarneq qitsuuteqarnerlu pillugit Inatsisartut inatsisissaatut siunnersuut matumuuna saqqummiuppara.

Siunnersuummut tunngaviusoq tassaavoq kalaallit qimmiinik qimuttunik malittarisassat qimminit qitsunnillu nalinginnaasunit malittarisassanit immikkooortitsinissamik ukiorpassuarni kissaateqarnikuuneq.

Taamaammat qimmiuteqarnermut qitsuuteqarnermullu malittarisassat siunnersuummi uani immikkooortippagut, peqatigitillugulu kalaallit qimmiinik qimuttunik qimmiuteqarneq illersuinerlu pillugit Inatsisartut inatsisissaattut siunnersuut ataatsimiinnermi uani saqqummiullugu.

Qimmiuteqarneq qitsuuteqarnerlu pillugit Inatsisartut inatsisaatigut qitsunnik qimminillu illersorneqarsinnaasunik passussisarnerup isiginiarneqarnerulernissaa atuutilersinneqarpoq aammalu qimmiuteqarnermut qitsuuteqarnermullu kommunini arlalinni ukiuni arlalinni periusaartunik arlalinnik piunasaqaateqartoqarluni, tassunga ilanngullugu ID-mik meqqiliisarneq nalunaarsuisarnerlu aamma qitsunnut akiuussutissamillu kapuisarnermut maannakkut aamma atuutilersinneqartussat.

Siunnersuummi kommunalbestyrelsip qimminik nakkutilliisuisa aamma Uumasuuteqarnermut Oqartussaqaarfimmi uumasut nakorsaasa akornanni sulii qanimut suleqatigiinnissaq siunnersuutigineqarpoq. Taamaalilluta qimmit qitsuillu amerlassusaannik, siammarmanerannik atugarissaarnerannillu oqartussat tamanik takunnissinnaanissaat qulakkiissavarput aammalu kommunalbestyrelsi ilaatigut qimminik qitsunnillu inuttaqanngitsunik illoqarfiit ilaanni ajornartorsiutaaleriartortutut paasinarsinikuusunik tiguisarnissamut tunniussisarnissamut toqutsisarnissamulluunniit pisariaqartunik sakkussaqalersinneqassalluni.

Inatsisissatut siunnersuummi immikkooortut pingaernerit innersuussutigalugit siunnersuut Inatsisartunut matumuuna suliaassanngortippara.